

---neslužbeni prevod---

Ministarstvo poljoprivrede, stočarstva i nabavke Federativne Republike Brazil
Kabinet ministra

Uredba br. 5, 07.02.2013.godine

MINISTAR POLJOPRIVREDE, STOČARSTVA I NABAVKE, po ovlastima koje mu daje Čl. 87, stav II, Ustav, imajući u vidu Ukaz br. 5.741 od 30.03.2006. godine, te Proces br. 21000.010730/2012-31, odlučuje:

Član 1. Uključiti u brazilsku legislaturu zoosanitarne uslove za prijem domaćih pasa i mačaka u države članice MERCOSUL, te model međunarodnog veterinarskog certifikata, odobrenih Odlukom MERCOSUL/GMC/RES. br. 52/12 od 05.12.2012. godine, koje se nalaze u prilogu ove Uredbe.

Član 2. Ova Uredba stupa na snagu na dan objavljivanja.

MENDES RIBEIRO FILHO

PRILOG

ZOOSANITARNI USLOVI ZEMALJA ČLANICA MERCOSUL ZA PRIJEM DOMAĆIH PASA I MAČAKA

IMAJUĆI U VIDU: Sporazum iz Asunsiona, Protokol iz Ouro Preta, Ushuaia protokol o demokratskoj posvećenosti u uniji MERCOSUL, Boliviji i Čileu, Odluku br. 06/96 Vijeća za zajedničko tržište (CMC) i Odluke br. 04/96 i 05/96 Grupe za zajedničko tržište MERCOSUL (GMC).

UZIMAJUĆI U OBZIR:

Da je potrebno ažurirati zoosanitarne uslove i model certifikata za prijem domaćih pasa i mačaka u zonu MERCOSUL.

GRUPA ZA ZAJEDNIČKO TRŽIŠTE MERCOSUL ODLUČUJE:

Član 1. Odobriti Zoosanitarne uslove za prijem domaćih pasa i mačaka u zonu MERCOSUL, kao i model certifikata, koji je u prilogu ove Odluke.

I POGLAVLJE

OPŠTE ODREDBE

Član 2. U ovoj Odluci, pod pojmom „domaći psi i mačke“ podrazumijevaju se primjerci iz vrsta *Canis lupus familiaris* i *Felis silvestris catus*, za koje će se u nastavku dokumenta koristiti naziv „životinje“.

Član 3. Uslovi navedeni u ovoj Odluci primjenjuju se i za stalni i za privremeni prijemak, kao i u slučaju učestvovanja na takmičenjima i međunarodnim događajima ili za međunarodni tranzit kroz teritoriju bilo koje zemlje članice MERCOSUL.

Član 4. Bilo koja zemlja članica MERCOSUL može ustanoviti specifičan automatski režim za prijem regulisan ovom Odlukom, primjenjiv od strane države članice prijema životinja u zonu MERCOSUL, prethodno dogovoren sa zemljom porijekla, kada u nekoj oblasti zemlje porijekla počnu važiti restrikcije ili zabrane koje se odnose na praksu određenih estetskih operacija ili

amputacija, ili za prijem primjeraka koji pripadaju opasnim vrstama, kao i zahtjev za identifikacijom takvih životinja ili zdravstvenih planova i programa sa ciljem kontrole/iskorjenjivanja određenih bolesti koje nisu nevedene u ovoj Odluci.

Član 5. Aspekti vezani za karakteristike kaveza za transport, kao i propisi vezani za način transporta, ekskluzivna su odgovornost vlasnika životinje.

II POGLAVLJE

CERTIFIKAT

Član 6. Za životinju koju uvoze, vlasnici moraju imati originalni Međunarodni veterinarski certifikat izdat od strane službenog veterinarskog ureda zemlje porijekla, koji sadrži sve zdravstvene garancije sadržane u ovoj Odluci.

Član 7. Za prijem ili povratak u zemlje članice MERCOSUL, Međunarodni veterinarski certifikat važi 60 dana od datuma izdavanja Certifikata. U tu svrhu, vakcinacija protiv bjesnila mora biti važeća tokom perioda važenja Certifikata.

Član 8. U slučaju privremenog ulaska (boravak kraći od 60 dana) u jednu od zemalja članica MERCOSUL, službeno lice na graničnom prelazu ne zadržava originalni primjerak Međunarodnog veterinarskog certifikata, već kopiju istog; vlasnik treba sačuvati originalni Certifikat do povratka u zemlju porijekla.

Član 9. Na mjestu ulaska/izlaska u/iz zemlje članice MERCOSUL, službeno lice ne zadržava originalni primjerak potvrde o vakcinaciji protiv bjesnila kod životinja koje je, u skladu sa uslovima ove Odluke, potrebno vakcinisati protiv navedene bolesti. U ovom slučaju, vlasnik mora sačuvati potvrdu o vakcinaciji.

Član 10. Zemlje članice MERCOSUL će odobriti prijem životinja koje imaju pasoš važeći u zemlji svog izdavanja, izdat ili odobren od strane službenog veterinarskog ureda zemlje porijekla, u kojem moraju biti navedeni svi podaci navedeni u priloženom modelu certifikata.

III POGLAVLJE

ZDRAVSTVENI USLOVI

Član 11. Životinja starija od 90 dana mora biti cijepljena protiv bjesnila prije ulaska u zonu MERCOSUL, a korištena vakcina mora biti odobrena od strane službenog veterinarskog ureda.

Član 12. U slučaju primarne imunizacije protiv bjesnila, izlazak iz zemlje porijekla može biti dozvoljen tek 21 dan nakon vakcinisanja.

Član 13. Životinja mlada od 3 (tri) mjeseca može ući u zemlju članicu MERCOSUL ukoliko:

- 1) službeni veterinar zemlje porijekla potvrdi, u naznačenom polju na Međunarodnom veterinarskom certifikatu, da je životinja mlađa od 90 dana; i
- 2) nije boravila u zoni gdje je izbilo urbano bjesnilo u posljednjih 90 dana, što se potvrđuje na osnovu izjave vlasnika i/ili službenih epidemioloških informacija.

Član 14. Vakcinisanje neće biti potrebno u slučaju zemalja ili zona porijekla koje ispunjavaju uslove navedene u odgovarajućem poglavlju Kodeksa za kopnene životinje Svjetske organizacije za zdravlje životinja kako bi bile službeno proglašene „bez bjesnila“, iako nemaju vakcinu koja je

službeno odobrena. U ovom slučaju, odredišna zemlja članica MERCOSUL mora priznati ovaj uslov, a potvrda da je zemlja ili zona „bez bjesnila“ treba biti uključena u Certifikat.

Član 15. U Međunarodnom veterinarskom certifikatu moraju biti navedene informacije o važećim imunizacijama protiv bolesti koje nisu navedene kao obavezne u ovoj Odluci. Osim toga, na Certifikatu moraju biti navedeni veterinarski tretmani primjenjeni na životinji u posljednja 3 (tri) mjeseca.

Član 16. Životinja se mora podvrgnuti, najviše 15 (petnaest) dana prije izdavanja Certifikata, tretmanu širokog spektra protiv unutrašnjih i spoljašnjih parazita preparatima koje je odobrio veterinarski ured zemlje porijekla.

Član 17. Najviše 10 (deset) dana prije izdavanja Certifikata, službeni ili akreditovani veterinar u zemlji porijekla mora pregledati životinju kako bi se uvjerio da je životinja klinički zdrava, da ne pokazuje znakove parazitoze, te da je u stanju putovati do odredišta.

Član 18. Odredišna zemlja članica MERCOSUL mogla bi odbiti prijem životinje kojoj je prethodno dijagnostificirana lišmenijaza.

POGLAVLJE IV

INDIVIDUALNA IDENTIFIKACIJA

Član 19. Svaka država članica MERCOSUL zadržava pravo da odredi proceduru za identifikaciju životinja. Kada se koristi elektronski sistem identifikacije, odgovarajući mikročip bi trebao biti u skladu sa normom ISO 11784 ili Prilogom „A“ norme 11785. Također, anatomska regija gdje je apliciran mikročip mora biti navedena na Certifikatu.

POGLAVLJE V

NEISPUNJENJE USLOVA

Član 20. U slučaju dolaska životinje koja ne uspunjava zdravstvene uslove navedene u ovoj Odluci na granični prelaz u jednu od država članica MERCOSUL, veterinarski ured te zemlje može poduzeti mjere koje smatra potrebnim kako bi se zaštitila zoosanitarna situacija te zemlje.

Član 21. Troškove i/ili gubitke bilo kakve vrste nastale usljed djelimičnog ili potpunog neispunjavanja uslova navedenih u ovoj Odluci snosi vlasnik životinje ili odgovorna osoba.

POGLAVLJE VI

ZAVRŠNE ODREDBE

Član 22. Države članice MERCOSUL će preko radne sub-grupe br. 8 navesti nadležne nacionalne organe za provođenje ove Odluke*.

*U Brazilu, nadležni nacionalni organ je Ured za međunarodni poljoprivredni nadzor (CGVIG/AGRO) Ministarstva poljoprivrede, stočarstva i nabavke (MAPA).